

義烏縣志

卷卷卷

四三二

義烏縣志卷二

山 峯 巖 洞 坑 石

邑治諸山脈從北發至南而支分黃檗洪堂屏列於後爲一邑之主山東則石樓對峙西則五雲孤撐而葛仙雲黃高倚南天勢與郡山芙蓉青同削出其他峯嶺巖洞亦多岨嶇竄窰別開異境故並志之以見鍾毓英流爭奇崧嶽非徒爲躡屐登高臨風舒嘯者紀名勝也志山

象山 縣東二里

魏家山 縣東五里

鷄鳴山

縣東五里高五十丈昔有人聞金鷄鳴其上羣鷄皆應故名前瞰縣郭傍晚太溪衆山縈迴上

有小亭九月九日士大夫畢會於此又名登高臺

劉元震遊鷄鳴山記鷄鳴山峙東江之左屈曲盤旋

來若無因止若無去突者若螺垂者若帶後枕小巔

里人構廟祀神而最高一峯挺出原野間或曰昔山

有金鷄鳴而羣鷄皆鳴或曰唐崔智輹逐化虎之婦

至此聞鷄鳴故名焉宋時有陳籛者因國亡結茅其

陽躬耕事母余先人嘗構小亭名登高臺歲九日與

鄉之士大夫會於此今圯矣登山曠覽北爲邑之龍

祈山鋸齒刀背諸崖青影逼人西北爲浦之仙華山

宋謝臯羽嘗同方韶卿吳子善輩登之以寓其中之

所感西則邑之稠嶺宋忠祐胡公惠政在人廟祀於

此西南爲雙峯下爲明宋景濂先生故址正南則郡

之芙蓉峯爲通郡人文所鐘秀而釣魚巖則南之最

近者上建浮圖七級東爲龍門宋王正叔先生講學

處也爲石門先世山南先生隱居處也東之南麓明

王忠文公託處於茲東北傍溪而聚族者則宋忠簡

宗公之遺裔而傍晚城郭則徐文清黃文獻之祠在

焉俯瞰山麓又有龔忠愍父子之墓皆歷歷可數中

有一江自吳寧蜿蜒入烏經蘭江以歸錢塘曾足跡
不越數武而數百里之奇觀勝蹟皆在几席間是歲
重九風日晴爽與諸子登其巘坐石磴分韵賦詩行
觴余顧而慨曰諸君得無有觸目而動心弔古而傷
今者乎龍祈之連天插漢奇矣未聞有名人碩士蔚
起其間遂與衆山埒焉而仙華復有登之者乎稠嶺
猶是也復有沒敬其神者乎景濂之文章與雙峯同
不朽今徒望芙蓉而羨秀觀釣巖而歎異而已孰能
講學使龍門增重乎砥節使石門豔稱乎保障封疆
仗義死國如忠簡忠文忠愍之表表乎孰能衍未喪
之傳立朝正直如文清文獻者乎川岳之鍾毓無時
或息而人士之後起何若前蹤必也積學博稽如文
獻景濂守道式時如文清正叔山南樹勲立節如忠
簡忠文忠愍而歿也如忠祐之歌祀勿絕其庶幾乎
然則登斯山而徒怡情風景恣意嘯詠豈但山靈所
不許亦吾與諸君子之所羞矣王禕登鷄鳴臺述
懷詩早秋未徂暑亭午忽凝陰旅居坐局束勝餞思
登臨幸獲陪衆彦駕言陟幽岑出關僅百武攀磴無
十尋稍已騁遐目遂茲舒鬱襟乾坤正納納歲月何
駸駸斯文付重託吾力懼難任道在已逾困命元天

可謀終應守素志誓勿枉初心
浩歎真有激微言聊自箴

石門山

縣東九里連山中斷兩山對峙如門 陳炳記
大凡有雄偉之趣者不必其聲之舊而後以爲

稱苟炳焉有異於吾耳目則人未之與吾弗可以漫
視也石門之爲山其有是與蓋吾邑繡川在婺之東
北隅去州治餘百里州之赤松三洞其勝異同天下
所聞而至於繡川勢以遠而不續故吾邑雖四障以
山而皆蚺蟻渙散傾頓渾昧無可以肆觀而人咸不
以爲有異趣歲在乙亥春陽方中予以文史之暇將
求夫有以抒吾懷者於是涉東江遵亂徑四曠探搜
而連山中斷有兩石隱隱相負而立者矗峭扃闔其
峯絕特於羣山予心異之遂以其形問塗於耕耨得
小陞崎嶇背東江去約三百步奄入短崖松林其中
漚然有水瀦焉曰古塘而東扶棘荆循樵採路以上
路窮而山在焉兩峯並峙由右腋陟其頂乃甚夷坦
可坐十二三人者小石磊磊若噐皿若編鐘磬其大
者若屏榻然可以環飲其下森松挺柏儼儼攢翬於
亂青中後有泉如乳脉疎豁酌其味滑且甘耕耨者曰
是夏冷徹骨而冬則溫因屢視四野巒列無遠近惟

所指前帶大江屈折入雙溪以之錢塘左右山去無窮而後山轉高每微風至瀕洞澎湃大聲相盪草木交樛時時有莽鬱清氣自足底降升激一嘯百谷翕蒼使人凜然不覺毛髮竦聳疑非人世吁茲亦可謂雄偉之趣矣而按之圖經詢之耆老寂焉莫有道石門山者何邪非以其處之隱而或隱且小雖言之而人有弗我信故與夫矜大而畧小趨顯而忽隱固俗之嘗情何足以爲失得而益益之沈沈可以想滄溟坻阜之巍巍可以意泰華吾於內既有以自廣則一涓之流一拳之石咸可以爲寄而況其又誠不苟然者邪予故爲記俾樂遊者自予言以始劉元震詩隔斷塵喧事尋幽每一過峯圍天覺小徑險石偏多白日閒麋鹿清風老薜蘿

欲移李子架高卧萬山窩

南山

縣東十五里蟠折榮迴廣袤數里上有平土可耕人多居之鮎溪之水出焉

石樓山

縣東二十五里亦名白巖山高五十丈周十三里四面孤絕兩山封峙遠望若浮圖狀山東西

有巖深袤數丈東厓之上有巖者四而巖之東由右逕行至第三級有天然石闌護其外少西又有數穴

狀若房闔一巖層級高下類重樓複閣羣巒環之若屏幄然

武巖山

縣東三十五里高數百丈周圍十餘里狀如紗帽其下有八景左滴水巖四時流注不絕聽之

若鼓
韻
虞熙傑有詩見藝文

凌雲山

縣南五里

後屏山

縣南十里為孔村座山圍列如屏故名

青巖山

縣南十里高五十丈有象鼻岡有邑人王禕衣冠墓王禕詩幽僻青巖中結屋開荒畦羣山

列左右雙澗鳴東西蕭然守岑寂環堵蓬蒿齊林泉幸清勝吾將暫冥棲

齊山

在青巖山中高三十丈下有雙澗南曰前溪北曰梅溪

天公山

縣南二十里

雲黃山

縣南二十五里一名松山高一百四十丈周三

十里二百步梁傳大士於此行道黃雲盤旋其上狀如車蓋故名有峭壁高百丈廣三十五丈下臨畫溪五色相映有穿身巖因大士穿石壁而出名有

餒虎巖因大士以齋餘飯餒虎名十道志云山多元
熊赤豹大士化之後不復出又有飯石乃餒虎餘飯
所化青白而紫又有七佛峯行道塔旋獅池諸蹟
邑人黃潛詩束髮弄文史掛席去瀛壖邂逅乖良會
損落迨茲年息景念生理洗心賓象筵恭惟上皇代
異人秘靈詮宗師既逾海茲山亦棲賢金棺滅雙樹
實篋絨紅蓮仰窺攝誘切信知願力堅內魏實菲薄
冥通未精專褰裳碧峯雨焚香石林烟綵翠何紛紜
苔澗空厓沿尋幽非外適蘊真冀重宣二邊離有無
五濁空腥臚豈伊俄頃用應謝平生緣縣丞劉傑
宿雲黃山詩偶因修史訪僊蹤夜宿雲黃第一峯蝶
影未回千里夢鯨音先動五更鐘光明列炬羅星斗
秀拔雙檣護柏松俄頃出山回首望露華涼浸玉芙蓉
知縣劉同次前韵詩雲黃勝日采遺蹤回首雙
林近碧峯聯轡喜聞秋後雁連床驚聽夜分鐘香浮
寶地當軒桂影落瑤堦夾道松共說浮屠靈有感法
光徧照翠芙蓉龔士驤雨後同陳大孚登雲黃山
詩探竒乘興復如何淺澗深松收者多樹杪人從雲
裏度山家春是雨中過烟明蘭若雄幢蓋水漬花原
冷薜蘿登眺不妨歸路遠陌頭試看踏青歌

石牛山

縣南二十五里雲黃山北石狀如牛故名上有石牛祠

鳳凰山

縣南四十里在野墅街之東形如飛鳳

飛鳳山

縣南四十里

石麟山

縣南四十里

塘山

縣南四十里高百丈上有仙壇多靈草有廟塑朱將軍禮像以祀其南崖下臨蜀墅塘其山廣與塘

稱故名

金靄詩登高力極碧峯頭東望天台西婺

州孤曜空懸天咫尺諸山環抱地沉浮民居繡錯雙

林迥女宿華開一帶流千頃墅

塘存水澗涵虛漂渺白雲秋

蜀山

高三十丈岷峙蜀塘中有怪石崢嶸在塘山之南相傳秦末有三山飛過墮一於此蜀人來言蜀中

所失卽此一

名飛來山

白石山

縣南四十五里在平望庄前高五十丈許舊傳淳化間有朱淨娘姊妹居其麓幼誓不嫁方春

米忽異香繞山經宿不散淨娘化為白石居
民立廟祀之祈禱輒應事聞勅封善濟夫人

葛僊山

縣南五十里高一百五十丈有煉丹巖相傳
葛仙翁煉丹於此又有雪峯嶺高八百丈

八保山

縣南五十里嘉靖間永康處州礦徒訛保作賣
糾訂開坑知縣趙大河率近山居民陳大成等

平之事
詳礦防

鳳林山

縣南五十里平地有山巍然突起高五十丈故
老相傳有鳳棲其上故名宋王氏立亭其上時

聚會亭廢有
王德生重建

王禕有記見古蹟

黃巖山

縣南五十里高五十餘丈南有
三填石石旁澗水如乳有八景

大寒山

縣南六十里山頂有池四時
不竭春夏溢出為瀑布泉

塔山

縣南六十里在前田庄
西南山頂有建塔遺址

來山

縣南七十里高二百五十丈羣山自遠來至此而
止故名山側有半印石相傳葛仙翁飲半於此

天龍山

縣南七十里上有菴菴前有虎頭山鼓嶺巖頂有瀑布澗下有石龜

五指山

縣南七十里在廿八都儼然一手勢若探天南向皆巖高聳壁立如削成北向五指界限分明

中指尖有石洞俗名虎祠

三山

來山之東北高四十丈一山三峯巍然聳拔上有三山廟

香山

縣西廿五里其地多楓香木故名上有香爐峯前有龍井遇旱禱之輒應又有夫人峯以梁侍郎樓

偃妻塋此故名有寺見寺觀寺有禮拜石達摩渡江駐錫於此

五雲山

縣西四十里唐時有五色雲幔其峯故名山口村前有繫馬石上有手捻痕相傳昔有神人繫

馬於此居民至今節序祀之又上有智忍巖下有邑人朱徐僑墓五雲溪之水合流山前徐僑歌雲山

窈兮風微山徑繚兮雲依蘭馨兮晨晞松樛兮久暉有禽逍遙其間兮不去飛俛啄兮藪薇昂吟兮綠筠

枝春與颺騰兮秋鶯與啼希鸞鵠兮志亦幾絕樊弋兮隨所棲空碧臨臨兮山四圍泉咽咽兮流以時寧

易地分頻若箕與世相忘兮幽人期山雖高兮步坦夷雲雖深兮光陸離胸洞洞兮陶然以怡祈天命兮宜安厥

娥眉山

縣西四十里

芭蕉山

縣西四十里

五坪山

縣西四十里北界蒲江

朝顧山

縣西四十里在黃坡塘左

留山

縣西四十里

黃塢山

縣北七里黃檗山之幹迤邐至縣治者

五峯山

縣北五十里

黃檗山

縣北二十里本名黃樞尖唐初置綢州於此山下後淨居寺僧易名黃檗黃潛記其起如

驚其伏如踞其支而出也如附靡迤而不絕抵縣治乃已江淹遊黃檗山詩長望竟何極閩雲連越邊

南州饒奇怪赤縣多靈仙金峯各虧日銅石共臨天
陽岫炤鸞采陰谿噴龍泉殘杙千代木齋峯萬古烟
禽鳴丹壁上猿嘯青崖間秦皇慕隱淪漢武願長年
皆負豪雄威棄劍為名山况我葵藿志松木橫眼前
所若同遠好臨風載悠然

龍岡沿山

縣北二十里溪山環繞屏巒抱翠

洪堂山

縣北二十三里在黃檗山北麓馬蹈石南檻尖楊公馬鞍諸山環列於後右闕廣輪綢香諸巖

在其前左顧四正雲黃四周如畫

青山

縣北二十五里鶴田之鎮頂有安樂窩即張衡居遊處

龍華山

縣北二十五里頂有平壙俗呼師姑平中有虎石其形似虎又有磐石鐘巖相傳僧達摩鍊法

於此其麓有龍華寺即法會教寺

馬鞍山

縣北二十五里高四十丈在馬踏石之東形如馬鞍故名絕頂有手掌痕

青潭山

縣北四十五里下有青潭其最高處曰春岡雪頂有鷹嘴巖石如鳥喙突出旁有戰巖相傳方

臘寇時民多避此墻址猶存山側有天聖潭形如大甕宋天聖間祈禱靈驗因名

龍祈山

縣北四十八里高六十丈山之西有水名深溪自縣北流入浦江旱時居民祈禱故名金以

琳詩龍創新開嶽底函桃花照錦落青潭海天烟月憑誰得會有雲衢駕紫驂

潛厓山

縣北五十里麓有象鼻岡椒有雙杉亭李鶴鳴詩獨往神逾靜冥搜路不迷青藤蛇上樹蒼

石虎吞溪複磴莓苔滑深林絡緯啼泉鳴珠珮迴嶂簇畫屏齊半嶺思清嘯懸巖想膜棲嵐光空翠濕天

勢蔚藍低藥辨千年種芝探五色泥恍如升紫府真似躡丹梯吏隱汚金馬仙魔陋碧鷄玉符原有訣寶

錄久應題永念凌紅霧終希馭白霓月華還可掇雲構定峯西

靈巖山

縣北五十里古有靈福寺邑人樓觀嘗讀書其中久廢

鐵巖山

縣東南二十里俗名郭公山極為峻峭攀援以登至山半有水簾下垂數十丈如懸疋練由水

簾側躡石磴以躋可達絕頂有曠土數百畝有三塢一潭舊有郭公寺

龍門山

縣東南二十五里南山最高處自山口循澗水磬折而行過師股潭石井坑登樓梯巖有平岡

橫亘其上是爲龍門旁皆平壤民多耕桑于其間絕頂有兩峯對峙名雙玉峯俗呼雙尖南下繭嶺俯瞰深谷有澗水經其中西流入於畫溪潭側石上有兩股痕隱然天成相傳傳大士濯足者

畫塢山

縣東南二十五里畫溪之水經焉其上中流爲斗潭其下對岸爲石壁

季塢山

縣東南三十里山巔有巖洞相傳四方之虎常會集於此俗呼虎祠每冬至必出入山邊時有

神馬出上下如飛其山前臨白巖東枕南安西挾石壁北坐畫溪計四頃零

霹靂山

縣東北十五里在宗宅庄前相傳宗忠簡公澤母夢雷電下燭其聲應於是山寤而生澤故名

鷄棲山

一名金峯山縣東北四十里峯上有石屋廣十餘步北有降魔峯西北有安貴嶺

箭山

縣東北四十里高三十丈青潭山之東橫亘山源之口山多竹箭故名

湖山

縣東北五十里山上有湖廣四畝匯水四時不竭故名

金麟山

縣東北六十里舊傳金麟見於此故名

茗平山

縣東北七十里俗傳法輪禪師茶園

主山

縣西南十八里從香山來為同義鄉之鎮上有童二大官殿其麓有寺

銅山

縣西南三十里頂有銅巖深數丈廣如之若房闥然相傳古有銅牛見衆逐之投山前塘中時謂銅

精山由此名

王元庚紀遊詩層巒拔地起崔巍獅座峩峩亦壯哉樹杪雲飛千澗雨磬聲遙接半天雷

有時烟鎖棋碁翠無事茶烹石室苔長嘯不知山谷韵欲空塵障上高臺

金山

縣西南四十五里屹立江流中

稠山

縣西北十里脈從香山迤邐至此直走嚴州其山平坦上有僧菴金漢鼎題其山門額曰古稠為自

義至浦必經之道外有茶亭古木陰翳人賴憩息焉

東山

縣西北二十五里崇巖峭壁竹木森蔚綠澗盤折至山半二石對峙中有釋氏抗雲精舍今廢遺址

猶存

陳大山

縣西北三十里

伏龍山

縣西北三十里五雲源

石佛山

縣西北三十五里

黃山

縣西北四十里有斷坑相傳黃巢入寇遣壯士鑿石爲之宋元豐中知縣鄭安平名曰黃山洞山左

有螺井泉根溪之水出焉

馬面山

縣西北四十里北界浦江形如馬面故名

椒山

縣西北五十里

大方山

縣西北五十里北背浦江東西綿亘十餘里